



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 10 Yangia anidakangma : Tir Yimyim tir yimyim TAPAK 8

Anurag Thakur-i Hockey  
India telemtetba aitsu

China matsüngdang Taiwan  
mapudaktsü: Tir Tsai Ing-wen



VOL. XIX NO. 4 (ADOK 4) DIMAPUR TENTONÜ (MONDAY) MONGPUTENI (OCTOBER) 11, 2021 ₹ 5.00

## COVID-19 Nagaland: 8 dak putet & 25 taneptsü angu

**Kohima, October 10, 2021**

(TYO): Deobarnü Nagaland nung nisung 8 dak COVID-19 aliba putet aser parnok züngsema nisung ajak agi 31,449 kümogo.

"Tesüiba ghonda 24 tsüngda nisung 8 dak COVID-19 putet. Parnokji Kohima nung 5, Dimapur nung 2 aser Mokokchung nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 puteta alir nisung 25 tashi taneptsü angu. Parnokji Dimapur nung 14, Kohima nung 5, Mokokchung nung 3, Kiphire nung 2 aser Longleng nung 1 lir" ta paisa ashi.

Nisung 31,449 rongnungi 29,505 taneptsü nguogo aser ibaji 93.81% lir, ta Dr Kikon-isa shisem.

Tang nisung 259 dak COVID-19 puteta anepalur saka parnok 187 dakbo shirangba yimya kecha mali, ta paisa metetdaksü.

"Honibar tashi nung nisung 695,960 nem COVID-19 vaccine indang dose 11,04,960 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,943, healthcare workers 15,997, arishi küm 45 ser temapur 199,595 aser arishi küm 18 nungi 44 tsüngda alir 419,425 lir" ta paisa shisem.

"Vaccine agirtem rongnungi nisung 408,173-i dose anaprong agiogo. Parnokji frontline workers 47,606, healthcare workers 13,306, arishi küm 45 ser temapur 144,916 aser arishi küm 18 nungi 44 tsüngda alir 202,345 lir" ta Dr Thurr-isa metetdaksü.

## NDPP NA-1 A/C-i CM Rio pusema nungittsü



October 9, 2021 nü Kire Farm, Chünyüca, D Khel, Kohima village nung NDPP 10th Northern Angami-I A/C lenirtem senden amendang tangokba noksa nung angur.

**Kohima, October 9, 2021**

(TYO): Taruba Nagaland state general election nung 10th Northern Angami-I Assembly Constituency nung Nationalist Democratic Progressive Party (NDPP)-i Chief Minister Neiphu Rio pusema nungittsü bangzüngtepogo.

October 9, 2021 nü Kire Farm, Chünyüca, D Khel, Kohima village nung NDPP 10th Northern Angami-I A/C lenirtem senden amendang iba ya bangzüngtep.

NDPP NA-I lenirtemisa Naga yimten tebilemsü atema inyaksü asoshi United Democratic Alliance (UDA) akümba pelashishia agizükba den pusema nungitba metetdaksü.

Parnokisa constituency nung NDPP party nung dennürtem anioxtsü atema mapa inyaksü lemtet.

Külen, NDPP Kohima Region-ia Chief Minister Neiphu Rio aser party President Chingwang Konyak na lenisüba kübok anidaktsü telemtetba ka agiogo.

"O masü mapatem" omen nung ajemdaker NDPP-i state ajungalen nübortem asoshi mapa inyaker, ta NDPP general secretary I/c Kohima Region, Prasielie Pienyü-i ashi.

Neiphu Rio-i aniba sorkari nübortem ajangzüksü atema kanga dang tashi itta aser nendaka inyaker. Anungji constituency lenirtemi iba nung nungita yariteptsü ayongzüker, ta pai ashi.

Kohima region nung assembly menden 6 aliba nungi NDPP MLA 4 lir aser taruba election nung menden ajak nungi takok angutsü atema merangtsüla, ta Pienyü-isa shisem.

NDPP Central Vice President Menuovilie Kesiezie-ia o jembidang constituency lenirtem dang party atema maneni inyaksü ayongzüker.

Party lenirtem aser züngsemtem tsüngda obang meputep adoka alibattem angatetteptsüla aser constituency nung party kangshir state level nung party nungittsüla, ta paisa ashi.

## CM Rio-i anir MLA temi Interlocutor Mishra aser NSCN(IM) den ajurutep

**Kohima, October 10, 2021**

(TYO): Deobarnü Chief Minister Neiphu Rio den NPF Legislature Party leader T R Zeliang aser Planning & Coordination Minister Neiba Kronu nungertemi Delhi nung interlocutor AK Mishra aser NSCN(IM) lenirtem den ajurutepogo.

"Tanep onoki Nagaland House nung A K Mishra den ajurutep aser tanga tesem ka nung NSCN(IM) chief negotiator Th Muivah, NSCN(IM) chairman Q Tuccu aser vice chairman Tongmat Wangnao nung den ajurutep" ta ketdangsur kati ashi.

Naga yimjung olemtep atema

Centre indang interlocutor melenogo anungji Naga nungeri aginüba ama tekaraba nung telemtetba agitsü atema inyaksüla ta CM Rio-i aniba teloki NSCN (IM) lenirtem dang ashi.

"Asenoki telemtetba ka agitsü atema temolung nung züngzünga yur shisa kaa mapa inyaksüla" ta parnokisa NSCN (IM) lenirtem ayongzüker.

NSCN (IM) aser India sorkar tsüngda obang meputeptsüsa onük kar alitsü akok saka telemtetba ka agitsü atema itemji angatetteptsü mapang ka tongogo ta CM Rio-i anir MLA temisa

metetdaksü.

Nagaland Chief Minister-i aniba teloki Central lenirtem aser national political party tem den ajuruteptsü tebilemba lir asü mali ta osangbenertemi asüngdangdang "tamasa asen teinyaksütem inyaksü aser iba sülen ang parnok den ajuruteptsü" ta ketdangsurü langzü.

Ajisüaka, tiyongtsü nung yariteper ka ama Nagaland state sorkari India sorkar aser NSCN(IM) dang tekaratiba nung telemtetba ka agitsü atema rongshitsü ta ketdangsurisa metetdaksü.

## BAN teloki Nagaland nung SARFAESI ozüng amshidaktsüner

**Dimapur, Oct.10 (TYO) :**

Nagaland nung business tapu balala tenzüka inyakertertem aser inyaknertem asoshi bank nung pei ali kimong talang (mortgage) yutsür sen aputettsüsa Securitisation and Reconstruction of Financial Assets and Enforcement of Security Interest (SARFAESI) Act, 2002 amshi tenzüksüla ta Business Association of Nagas (BAN) teloki nung tir Wb. L.Mongküm Jamir aser tongti zülur, Wb. Yan Murry nati sangdong ka nung nenshia metetdaksüogo.

Tawa BAN teloki iba nungdak ken o ya state government nem mapa küma inyaktaktsünüa yimjak nung metetdaksüba sülen, Nagaland Bar Association (NBA) telokibo Nagaland nung SARFAESI ozüng ya amshi tenzüker nung majungtsü, kechiyong sen apurtemi sentsü maotetra, iba ken o ji okadak benok mejembii Bank aser Financial Institution-temi parnok agent Assets Reconstruction Company purtem ajanga agiadoktsü koka lir ta metetdakja liasü.

NBA teloki sangdongba ken o ji, BAN telokisa jangjashia metetdaksüba osang ka nung ashiba agi, sen apurtemi sentsü maotetra ajanga tapi agidang sen aputsür Bank aser Financial

Institution-tem jagi talang yuja aliba ali kimongji agiadoktsü mesüra yokadoktsü ta masü, saka sen apur jagi anogo 90 tashi kecha mapa inyakba osang mali aser sentsüa magütsü ta süidaksü nung dang, sen aputsür jagi ango 60 mapang agütsütsü aser iba tsüngdaji sentsü maotet nung dang parnok ket nung ali kimong yuja alibaji agiadoktsü mesüra yoktsütsü. Ano, sentsü maotettertem jagi pei temeten ken o kar benoknüra, ibajia Debt Recovery Tribunal tsüngdang benoktsü asoshi SARFAESI ozüng nung shia lir ta BAN telokisa metetdaksü.

Business inyaknertem asoshi mapa tenzüksü, inyaka aotsü aser ano tuluba küma yangluloktsü atema sen nungdaker, saka iba nungdak atema sen apudak makaba jagi mapa metenzüketter, anungji Nagaland nung business inyaknertem asoshi sen apudak akatsüsa SARFAESI ozüng ya amshi tenzüksüla ta BAN telokisa ashi.

India temzüng arla 371 A nung Nagaland nung akaba ali aser yangji aliba rongsen ajak ali kiburtem meyong lir ta shia lir, anungji Nagaland nung Naga nung ali kimongji tangar dang ayoktsü makoker, iba jagi Bank purtemia Nagaland nung akaba Naga nung ali kimong talang

yur sen maputsütetter. "Asenoki linük temzüng arla 371 A nung dang onsara rangloker aliba agi, asenoki maongka agitsüba tulubalenka mangu süidaksü, iba jagi asenok timatemer," ta BAN-isa ashi.

"Mapang kopiga asenok Naga nungertem takar lima nung sensaka alitsü ?" "Asen lima nung rongsen peria lir ser nung, itemji mamshitet yur, mapang kopiga Delhi nung oagi center government dang meshimetsütsü ?" "Asenok takar küma alitsüsa rongsen moatsüa lir ser nung, kechiba asenoksasa asenok meshimetsür kümner ?" ta BAN telokisa temulung rongka metetdaksü.

Asenok ita sen nung dak metaloker ali tashi rongsenren nung merenloktsü. Rongsen renloktsü aser nübortem asoshi mapa adokdakja alima takar kümdaktsütsüba jagi business tapu balala tenzüka inyakba agidang ataloktsü, anungji state government-i iba rongdak nungdakji angateta business inyaknertem asoshi bank nungi sen aputettsüsa SARFAESI ozüng ya linük temzüng arla 371 A(1)(a)(iv) den külemi mapa küma inyaksüla ta BAN-isa metetdaksü. (Tanü Yimobilem, tapak 4, nunga iba kasa onük indang angutsü.)

## Miya nung votes maginür : Assam CM Sarma

**Guwahati, October 10, 2021**

(Agencies): Bharatiya Janata Party (BJP)-i Assam nung Miya nung votes maginür ta Assam Chief Minister Himanta Biswa Sarma-i nenshia metetdaksüogo.

Assam nung Miya nung ta asüba ya Bengali oshi jembiba Muslim nung dang ajar.

"Ni Miya nung votes maginür. Onok külemi alir saka ni parnok dangi votes meshia maoyer aser parnokia kü dang marur" ta 19th India Today Conclave, 2021 nung jembidang Sarma-i ashi.

"Tangalen nungi aruba Muslim

nungertem ajanga Assam nung maitsü, sobaliba aser ali sama ta Assamese nung aikati bilemer. Assam nung kin nung ajemdaker politics mapa mienyak. Iba ya linük Nüjiso angutsü lia nungi tenzüker. Ni iba putiotsü indang khuret abener" ta Sarma-i ashi.

"Tangalen nungi aruba Muslim nung renlokba ajanga ali atsünga agiba khuret ajurur" ta paisa shisem.

Taoba ita Sipajhar nung nisungtem meindokba mapang lendong atalokba indang jembidang "Assam nung sempaa

inyakba mapa mali. Kibong 1,000-i ali acre 77,000 atsünga agiba atema onoki parnok meindok. Kibong kati ali acre 2 den teimba magitsü ozüng lateta lir" ta Assam CM-isa metetdaksü.

"Onoki nisung aika nem ali agütsüogo. Ali atsünga agiba atema onoki nisungtem meindoker. Ali atsünga agirtem meindokba ya tanen makai inyakba maparen ka lir. Assamese lisopurtema meindoker. Iba nung kin dak rangloker inyakba kecha mali" ta Sarma-isa ashi.

## Mokokchung nung World Mental Health Day 2021 mungogo



October 10, 2021 nü Town Hall, Mokokchung nung World Mental Health Day amungba noksa nung angur.

**Dimapur, Mongputeni/Oct. 10 (TYO):** Town Hall, Mokokchung nung October 10, 2021 nü World Mental Health Day mungogo. Iba sentong ya District Mental Health Programme ajanga All Nagaland Counselors Assosiation (ANCA) Mokokchung aser Child Helpline Mokokchung den lungjemer "Mental Health in an unequal world" omen nung ajemdaker ayongzüka liasü.

Chief Medical Officer Office, Mokokchung ajanga sangdong ka nung ashiba agi, iba anogomung nung Sashant Pratap Singh, ADC Mokokchung ajanga sentong nung adener dang mental health indang tai angatetba lir, ta shia liasü.

Tekolok manemba/meshidakba ya tetsür-tebur, rongsen jenjang mesüra arishi küm telemsa balala nung ajur masü, ibai ajaki mashi mapang ajurutsü, ta pai ashi.

Iba anogomung amungba

ajanga tang mashi aser meshidak angateta aliba ajunga jangjatsü, ta ashi.

Iba sentong indang nukjidong aser anogomung omen nung ajemdaker Temsuyanger, Nodal Officer, DMHP Mokokchung ajanga jembia liasü.

Psychological health services agiba tsütsü bendanga amshiba lir aser nisung aikati mental health shidak alitsü nungdakba angateta mali, ta pai ashi.

Item timtem bushitetba maparen nung ajaki shilem agitsüla, ta pai ajunshi aser iba anogomung amungba mapang angazükba nung ajemdaker nisung kija shia shisa agütsür kaka asütsüla, ta shia liasü.

Merenchila Imchen, Counselling Psychologist, Childline aser Alemrenla, Counselling Psychologist & Educator, ANCA nati iba sentong nung "Mental health within home environment" aser "Mental Health in the workplace" onük nung jembia liasü.

Kidang kibong nung kinungertem tsüntga sensaksemba ajanga tesendaktep tajung yangluba, osangtsüsang shidak magitepba aser itemji ajanga shisabulu khuret bendenlokba aser mapa inyakba tesem nung tangatetba tsütsü mepet-mesü adokba indang sentong nung shilem agir nem angatetdakwa liasü.

Pei mental health jenjang metettsü atema yimyatem lemsatepba den külemi meditation agitsü, tekolok anibelem samadaktsütsü atema counselling agitsü aser mapa balala inyaktsü indang lemsatepba liasü.

Monica, Psy. Social worker (DMHP) ajanga melepzüng o jembia sentong ya tembanga liasü. Iba sentong nung nisung 173 arua aden, shirnok school, college, nursing school, mapa inyakertem, DIPR, IEC personnel aser Chief Medical Officer Office nungi staff tem dena liasü.

## Tuli Area Coal Mining Contractors' Association senden amentsü

**Dimapur, Mongputeni/Oct. 10 (TYO):** Tuli Area Coal Mining Contractors' Association pur 9 buba Lokti Senden (General Meeting) October 12, 2021 anepdang 10:00 ako nungi tenzüka

P. Ali, Yimjenkimong (Treasurer) kidang amentsü, ta sangdong ka ajanga ashi.

Iba senden nung jembitsü agenda ajak senden metenzükdang ketdangpur ket tongtsütsüla,

züngsem saru senpak 200 alitsü aser senden nung kuli tejanga makai medenra takhang senpak 500 alitsü, anungji züngsem ajak medema arua adentsü metetdaktür, ta sangdong ajangasa ashi.

## Chuchuyimlang nung Natwar Thakkar asoba anogomung mungogo



(Abelen) Chuchuyimlang Kaketshir Telongjem züngsemtemi Chuchuyimlang nung makamait jenjang nung alirtem nem teyari agütsüba noksa nung angur. (Achiji) Village Level Organisation züngtemi nungdaka alirtem nem mapa tajung inyakba noksa nung angur.

**Dimapur, Mongputeni/Oct. 10 (TYO):** Nagaland Gandhi Ashram tenzüksang, Natwar Thakkar asoba anogomung October 9, 2021 nü Chuchuyimlang nung munga liasü.

Nagaland nung aliba nüburttem aser talisa

Chuchuyimlang aser temeket yimtsüngtem nung tekübokba jenjang nung alirtem asoshi Thakkar-i bendanga agüja inyakba akum agüja pa asoba anogo ya Nobel Deeds Day nungja agütsür amunger.

Natwar Thakkar ajanga Nagaland Gandhi Ashram ya

1955 küm Chuchuyimlang nung amenok aser iba sülen yimjungtesunep, 'emotional integration' ajungketba maparen inyaka ano Gandhi tesayuba aser tangatetba nung region nung socio-economic tsütsü terenok maparen balala inyaka aru.

Thakkar ya 2018 küm

## ASLB SANGDONG

ASLB-i achaayanga agiba Arangtet Tatidang-2021 Yimpoksüi (November) tatembangba hopta ana tsüngda nung agitsü lemtetogo aser ASLB office-i tensa mapang apir memenui anogo tejanga metetdaktütsü. Anungji tatidang agütsütsüpur ajaki 2021 A.T. Tenren tasenba atema office den tongtepratepa tatidang agütsütsü sangdonger.

Sd/-  
Secretary, ASLB/AC

## Merenzungba Longkumer-i Mr. Dimapur 2021 takok nguogo



**Dimapur, Mongputeni/Oct. 10**

**(TYO):** Tetso College, Dimapur nung October 9, 2021 nü Mr. Dimapur 2021 mezüngbuba season agia liasü. Iba sentong ya Meraki Entertainment ajanga ayongzüka, kong Merenzungba Longkumer-i Mr. Dimapur 2021 nungja ngutet, Kito A Yepthomi aser Kilito G Chophy nati 1st Runners Up aser 2nd Runners Up jenjang nguteta liasü.

Iba sentong nung Dimapur District Autorickshaw Drivers' Union tir Tito Yepthomi ya tesemdanger tongti ka ama arua dena liasü. Sentong nung pai tetokteper aser tereprangertem dang sorkar mapa matai pei takum litettsü mapa mashi inyaktsü ayongzüka liasü.

Maneni iba ama sentong tajung ayongzüka atema pai Meraki Entertainment nem tenütsang agütsü aser ano sen lakh ka tenla agüja liasü.

Mr. Dimapur 2021 sub-title

takok angurtem yamai alitsü:

Mr Physique - Ichizuibe

Chamlak

Mr Popularity- Kito A Yepthomi

Mr. Talent- Lanrilung Gonmei

Mr. Multi-Media- Nuvosayi

Rhakho

Mr Fame- Nungsangrenba

Mr Best Model- Imkongkumzuk

Mr. Best Ethnic Wear-

Merenzungba Longkumer

Iba tetokteperba nung

tetendangertem Opang Jamir,

Fashion Model/Mister

International India 2012/Brand

Ambassador of Liso Pure &

Natural/ Brand Liamtra; Narola

Jati, Armed Branch Sub-Inspector

Nagaland Police/Brand

Ambassador of Hope Channel;

Rapborlang Lyngdoh Zonal

Director of Talenticaa East India/

Miss India Globe & Mr. India

International nungertem liasü.

Iba sentong nung Official

Photographer Keyi Putlang,

Videographer- Dolen Quinker, Show

Director, Mentor & Choreographer

Sanjeev Tamang, Make-up Artist-

Style-up Unisex salon aser Host-

Zuchobeni Tungoe liasü.

October 7 nü asü.

Yimdak-yimtsüng nung alirtem ajangzüksü atema Thakkar-i shilem tulu agiba temaitsü Chuchuyimlang Village Council ajanga pa asoba anogo ya Nobel Deeds Day ta sangdonga liasü.

Iba anogo nung yimtsüng nung alirtemi pei akokba jenjang nung mesüra lungjemer kija mesüra lokti ajangzüksüsa teyari mapa balala inyaker.

Taküm Chuchuyimlang Kaketshir Telongjem-i Nobel Deeds Day asembuba ayongzüka yimtsüng telungzüka aser tezülen aliba nisungtem aser lokti atema teyari agütsüba mapa inyaka liasü.

Iba anogomung ya Nagaland Gandhi Ashram nung sentong ka agia tembanga liasü. Iba sentong nung sangru azüngba (an ode to Nagaland's Gandhi), temeja ken atenba, ajungshitepba aser National Institute of Electronics and Information Technology (NIELIT), Chuchuyimlang nung azüngertemi Natwar Thakkar

taküm otsü jilushi aiba aser pa taküm aser mapa indang documentary sayua liasü.

Iba sentong nung Dr Chubala Aier, Chief Medical Officer, Mokokchung; R. Arenla Aier, Acting Principal, Fazl Ali College, Mokokchung;

Limakumla, EAC,

Chuchuyimlang; Dr. Aotoshi,

Managing Trustee, Nagaland

Gandhi Ashram, Chuchuyimlang

aser Chuchuyimlang Village

Council nung Chairman aser

züngsemtem, Arogo lenirtem

aser nüburttemi Thakkar nem

akum tetushi agüja liasü.

Iba anogomung nungtem

nung Natwar Thakkar taküm

aser mapa dak rangloker

online painting aser essay

zülutepba sentonga ka agia

liasü. Lenir Thakkar-i nüburt

atema mapa tajung balala

inyakba indang awareness

agütsütsü nukjidong nung iba

tetokteperba ya ayongzüka

liasü, kong takok angur nem

senpet den kuli kakat tem

agüja liasü.

# BJP-i Manipur Assembly election nung takok angutsü: JP Nadda



BJP national president JP Nadda-i Manipur nung lokti senden ka nung o jempidang tangokba noksa nung angur.

**Imphal, October 10, 2021 (Agencies):** BJP national president JP Nadda-i Manipur State nung BJP-i aruya aliba Assembly election nung takok angutsü teimla tulu lir ta ashi.

"Manipur nung nüburtemi BJP sorkar inyakym tsütsü pusemba ngua state nung tanaben BJP arutsü teimla lir," ta JP Nadda-i ashi.

State nung taruba Assembly elections atema BJP pur renemshiba maparen asadangshitsü atema Nadda-i anogo ana atema Manipur nung arua lir.

Nadda-i state nung telok balala longjemer yimsü süa aliba sorkar indang MP aser MLA

tem aser BJP züngsemtem den ajurutepa liasü.

Manipur nung MP aser MLA ajak dang party aser sorkar tsüingda tesendaktep tajung ayutsü atema BJP national president Nadda-i mepishi.

BJP MLA tsüingda kari tang teinyakdak aliba chief minister Biren Singh dang mepelaba sayuba mapang ka nung Nadda-i Manipur semdang asütsü.

State nung lisopur MLA tem tsüingda obang meputep adoka lir aser State cabinet nung portfolio teimba atema BJP den külem sendaktepa alir teloktemi akhanger.

BJP indang teloktep telok

National People's Party (NPP) MLA temi chief minister Biren Singh-i bendanga benshiba inyakym ngua mepelaba lemsatep.

Sangküm Assembly elections nung BJP-i yimsü süa aliba state trok rongnungi Manipur densema iba election nung shilem agitsü terenemba lir.

Deobarnü Imphal kübok Shri Govindji Temple nung JP Nadda-i sarasadema liasü. Iba mapang Nadda sen chief minister Biren Singh dena liasü.

Honibarnü Bishnupur nung public rally ka nung jembiba mapang Nadda-i Manipur State ya "Atmanirbhar Bharat atema süngküm ka" ta sangoktsü.

# Guwahati nung petrol jenjang sen 100 adenogo

**Guwahati, October 10, 2021 (Agencies):** Assam State kübok Guwahati nung petrol litre nung sen 100 adenogo.

Guwahati nung petrol litre nung sen 100 dak tema atuba ya tang mezüing asütsü.

Deobarnü Guwahati nung petrol litre nung Rs. 100.07 aser diesel litre nung Rs 92.57 agi yokogo.

Petrol aser diesel jenjang tujen dang atuba yong Guwahati nung senzüsenbongertem kanga mepelar. Assam talisa Guwahati nung totzü jenjang tupet dang atuba yong nüburtem kanga okronger.

Alima ajunga asüingba Covid-19 wara ajanga nübur

aika sen tarulen tetsükdaktsü tulu adokdaktsüogo aser; petrol aser diesel jenjang tali amketa atuba ajanga khuret talila bendenloktsür.

"Petrol aser diesel jenjang atuba ama onok itasen matur. Nüburtem asoshi sorkari bilemstsütsüla. Iba ama tensa ajurudang nüburtem ang timtemer," ta Guwahati kübok oil station nung Rajib Das-i totzü inokba sülen ashi.

"Ni shishilembar tilaka dang aser Ganeshguri nung dokan ka lapoka lir. Covid-19 wara adokba aser lockdown tenzükbä sülen nungi shishilembaba tsütsü timtem adokdaktsüogo. Tawa tanü, pei poksüing atema sen aazütsü

tasüsa timtem. Iba den külemi totzü jenjang atuba ajanga timtem talila bendenloktsüogo" ta Deependra Borgohain ta ser nisung kati osangbener dang ashi.

"Developmental scheme ta nüngia balala agütsür mapatong tasen tenzükbä aser company tulu nem project tululu agütsü dang nungibo Sorkari nüburtem asoshi mezüing bilemstsütsüla. Tang totzü jenjang atuba khuret ya Sorkari mezüing bentettsüla. Parnoki külem nüburtem atema khenyongi dang mebilemstsür" Bimal Bora-ia ashi.

Honibarnü Assam kübok Dibrugarh aser Lakhimpur nung petrol jenjang sen 100 dak tema tuogo.



Indo-Bangladesh arrtsülen Border Security Force (BSF) sepaitemi Fake Indian Currency Notes (FICN) shibelener ka apuba sülen agiba noksa angur. Iba nisung ya Azizul Haque ta jangjaogo aser pa ket nung FICN Rs. 60,000 bena lia apu. (Dhubri, October 10)

**Piles Anepaluba** - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajsüaka, tang Kabiraj H. Umar Chesam contact no. 8416087414 / 6909717178 National awarded H. Umar Chesam Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüingda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - Kevi, Add: Khujuma Village



# CM Deb lenisüba kübok BJP-i assembly election tokteptsü

**Guwahati, October 10, 2021 (Agencies):** Chief minister Biplab Kr Deb lenisüba kübok BJP-i Tripura Assembly election tokteptsü ta BJP national General Secretary & Tripura in-charge Vinod Sonkar-i ashi.

"Tripura nung lenisüba memelenshitsü. Chief Minister Biplab Deb lenisüba kübok BJP sorkari state nung mapa tajung inyaker aser tarutsü nunga inyaksü. Pa lenisüba kübok BJP sorkar ketdangsüa aotsü. Deb lenisüba kübok taruba Assembly election nung BJP-i tokteptsü" ta Sonkar-i metetdaksü.

Tripura nung BJP MLA kari

chief minister menden nungi Deb agientsü atema takhangba agütsüba mapang BJP national General Secretary-i iba osang ashi.

"Taoba mapang Trinamool-i Tripura nung kanga toktepdang saka tamakok angu. TMC party candidate temi toktepdang menden ajak nung deposit akoksa liasü" ta paisa ashi.

Tripura nung Chief Minister Biplab Deb lenisüba kübok ochimashi maliba, ozüing alema inyaksangshi maliba aser terenlok bener aruba BJP sorkari yimsü asür. Taruba Tripura assembly election nung Trinamool-i takok angutsü teimla kecha mali" ta Sonkar-isa ashi.

# Model Rajkanya ken o nung neurosurgeon Dr Navanil Barua apu



**Guwahati, October 10, 2021 (Agencies):** Deobarnü Guwahati police-i neurosurgeon Dr. Navanil Barua puogo. Dr. Barua-i model Rajkanya Baruah yariba atema tai tonglokja apu.

Dispur police-i Indian Penal Code (IPC) kübok section 102, 212 aser 120 (B) kübok Dr. Barua apu.

Dispur police-i Hokolbar aser Honibar anüing dang neurosurgeon Dr. Barua dang asüingdangya asü.

October 3 nü Dr. Barua-i taoba Miss India finalist Rajkanya Baruah tekolak yiru

ta "false medical certificate" ka nung sign sür la mozü kidang aniok.

Rajkanya-i iba certificate nung ajemdaker police nem asüingdangya mesüdaktsü.

Hokolbarnü Kamrup (M) Chief Judicial Magistrate (CJM) court-i model Rajkanya anogo 14 nü tepuokdak ayutsü tetuyuba agütsüogo.

October 2 nü GS Road, Guwahati nung Rajkanya-i gari agi nisung 8 dak atsükba sülen Assam police-i la apu saka ghonda 24 tsüingda la bail nung chioka liasü.

# Golaghat nung arem shidii tetsür ka ajemset

**Guwahati, October 10, 2021 (Agencies):** Assam kübok Golaghat district nung arishi küm 21 tain tetsür ka arem shidi agi ajemset.

Honibarnü Jyoti Tanti-i ayong nung tzi agitsü atema aodang arem shidi kati la amak tad forest ketdangsurtemi ashi.

Police-i la indang mang ngutetogo aser SKK Civil Hospital, Golaghat nung postmortem atema bener ao.

Forest Department-i tasür kibong nem senotsü teyari agütsütsü ta osang metetdaksüogo. Taoba ita Guwahati tezülen aliba Rani

Reserve Forest nung arem shidi telok kati Assam nung BJP lennir Rajib Boro ajemset.

Tesüiba küm 10 tsüingda Assam nung nisung-shidi mangatettep tatalokba balala nung nisung 890 tshi süogo, ta Forest & Wildlife Department-i ashi.

Küm 10 tsüingda Sonitpur district nung nisung 124, iba sülen Udalguri district nung 118 aser Goalpara district nung 78 ajemsetogo, ta parnokisa metetdaksü.

Taküm Assam kübok tesem balala nung arem shiditem ajanga nisung 100 tema ajemsetogo.



## TIR YIMYIM YIMOBILEM (EDITORIAL)

DIMAPUR TENTONÜ, MONGPUTENI (OCTOBER) 11, 2021

### Sen aputsü nungdaker

**G**overnment mapa inyaka ita sen chia alitsüba taküm indang dang meblemi, iba dang nungi tesadamba taküm lia aotsü asoshi business tapu balala inyak tenzüksü bilemetsüba Nagaland nung alir lanurtem asoshi kanga rongdak nungdak kümogo. Atangji, shibaibo pei jangraba aser nübortem nungdakba yangluteta mesüra bener arua ayoktsüsa business tenzuka meinyaknüi ali? Shidi asünungbo, tanü asung lanurtem teimbakati government mapa nem alendaktsür taküm piyong yangji alitsü agibo, peisasa mapa ka inyaka pei asoshi dang masü saka nübortem nema nungdak langkabosa agütsütetsüsa entrepreneur kuma linür. Ajisüaka, asenok yabo otsüla oboula nung mapang nungi business inyaka sen amshia aruba nisung masü, anungji temulung nung business tenzüksü lenmang aika bilemyonga, tenzüksü sen (capital) maka aser taputsür-a mali ta pei bok mesütsü atema ita sen mechimenuka chia alitsü danga mapa ngura, ajiang inyakdi ta asütsüsa takümü atemer. Business Association of Nagas (BAN) teloki ashi amaji, asen limabo takar saka asenok sensaker kuma alibaji asenoki temulung nung bilemba mapa tenzuka meinyaktetba ajanga lir. Asen lima nung akaba tanga senti rongsentemji yutsür, ali tema nung asenoki ngua akaba süng aser long kisung agi sen kumdakja asenok takar akümtsü lenmang aika lir saka long aser süng jagi sen kumdaktsütsüsa mapa tenzuka inyaktsüba sen nungdaker, anungji sen aputsüla. Ashiko, asenok aikati sen apur business inyaktsüba tim masü amato bilemetsü akok, kechiyong asenok akhi sobaliba nung aji maket, saka alima nung business inyaker tulutiba nungi tilatiba tashi bank aser financial institution nungi sen apur tenzükbatem dang lir. Aji oda, bank lapokba nükjidong ya asen sen ayutsüba dang nungibo asen nem bank purtemi sen aputsütsüba jiang tongtibangba aser parnok asoshia tajangzükji yang nung jagi dang angutsü. Ajisüaka, Nagaland alir Naga nungertem asoshi timtem kaji yimtak yimtsung nung akaba pei ali kimong bank nung talang (mortgage) yutsür, iba alangji sen maputetter, kechiyong Nagaland nung Naga nungeri liji bank-i agitsü makok aser tangar bendanger dang ayoktsüsa makok. Iba yongji asenok asoshibo bank lapokba nungi tajangzük kangabo mangur aser bank purtema asenok nem sen aputsüba nungi tetemlok angutsüba tajangzük angutsüba lenmang to shibanga lir. Aji oda, tanü Nagaland nung lanurtem entrepreneur kuma business inyaknertem asoshi tebilemetsüji pei ali kimong lir saka ibaji bank nung talang yutsür sen maputetba timtem ya lir. Anungji, Nagaland nung Naga nungeri lanurtem peisasa pei jangraba mapa tenzuka entrepreneur kumdaktsütsü asoshi bank aser financial institution nungi sen aputetsüsa lenmang lapoktsütsü tim. Iba atemaji sentsü maotetba agi, Naga nungeri ali kimong ajak tangar bendanger keti aotsüsa masü saka Naga nungeri Naga nungeri meyongsa asütsü saka aliji bank nung yutsür sen aputetsüsa BAN teloki ashi ama, Securitisation and Reconstruction of Financial Assets and Enforcement of Security Interest (SARFAESI) Act, 2002 ya asen dak apet linük arla 371 A den putepa yanglur amshi tenzüksüla. Tetezü, Nagaland nung akaba ali kimong bank nung talang yur sen apubaji sentsü maotet bank-i agitsüsa aser yokdoktsüsa kümra, bendanger dang masü saka Nagaland nung alir lisopur Naga nungertem dang ayoktsüsa ozüng tasen ka latetsü nungdaker. Iba atemaji state government aser Village Council kuli alitsüla aser bank nungi aliji alir melira state government rongsen akümtsüsa ozüng tasenba nungji arla kar shisema alitsüla. Tanü Nagaland nung lanurtem ya mapa meinyakner masü aser mapa makaa masü saka mapaa kar aser teinyaka inyakner saka mapa tenzuka inyaktsü asoshi sen makaba timtem lir. Iba timtemji koktettsüsa state government-i parnoki bank nungi sen aputetsüsa lenmang lapoktsütsüba jiang kanga rongdak nungdak kümogo. Atangji, government sentong balala kubok lanurtem mapa tapu balala tenzuka inyakdaktetsütsü asoshi sen aputsüba sentongtema lir. Ajisüaka, item sen jagi takok anguba osang kangabo mangashir, kechiyong government nungi apuba senji aikati angati sen amai bilemer aser taputsüria shitakba project tenzüksü asoshi sen lakh ter nungdaker ser nung sen lakh ka ana jung mejuangka aputsür. Iba jagi sentongji mapa kuma meinyaktetter. Tangbo joko yamaji mesüi, tejangrar nembo sentong dang shitak süra, mapa tenzüksü aser tuluba akümtsü asoshi sen kwi nungdakar, iba sen shitakji aputetsüsa ozüng lateta alitsüla. Iba jagi dang, tanü lanurtemi bilemba, metetba aser rajemba shisatsü agi rongsen kuma Nagaland nung nübortem dang masü saka Nagaland government dena takar akümtsü.

## OLEMSABANG

### CLEAN ELECTION NUNG AROGO ASER YIMTSÜNG PUTU MENDEN TEINYAKTSÜ

~ Mr. Among Jamir (Osang Zülur)

(Yashi adok nungi...)

Putu menden nung yimsüsürtema süang mesüra sorkar tenzükba pangdak nung yimsüsürtema süang, iba ya Tsüngremi agütsüba maongka ta angatetsü kanga tongtipang lir. Iba indang Rom shity tapu 13 nung tejangja shia aliba angutsü aser iba onük ya yimsüsüba pangdak nung alirtemi jangja rajema angateta inyaktsüba jiang kanga dang tongtipang lir. Putu mendenji democratic principles nung yanglua lir aser alima otsü nungji repringdangra democracy-ji akhi Greek nung mapang nungi beshia aru.

John Calvin dang Father of Modern democracy ta ajar aser reformertem Calvin nung amai tenzuka inyaka arudang, nisung tashi mait ya onsara asü nungji kodang nisung ka ket nung dang yimsüsüba tashi pangdakji yutsüdir majungtsü ta angatet nungji, John Calvini anir Tsüngrem O tesayuba bushitepdang, Isaia 33:22 kong Kibuba asen o bendangsang, Kibuba asenok nem ozüng agütsüsang aser asen Kibubaji asen Chuba ta shia aliba iba asem nungji amendaker Tazüngkonem 16:17-18 nung chuba putirtem aser aikartem teinyaktsütem item nungji agitetba democratic set of government-ji Geneva yimti nung inayaka tenzük. Alima otsüren nungjia, reformation sülen shirnoki Tsüngrem O nung amendaker yimsüsüba medenji amshia yimsü-asütsü merang item yimlitemji jangratema lia aruba angur.

Putu menden nung alirtemi na menden nung mena alibaji kanga dang temeshi ta, kanga dang metsünga-reta, anemponga, Tsüngrem dak rangloker yimsü asütsü tangatetba alitsüji kanga nungdaka lir. Shirnoki iba putu mendenji tim mesüi (misuse) amshidir, iba temeshi mendenji nai atak-atema raksatsür asütsü. Tanü asen Aor yimtsüngtem nung senso candidate shimli yimtsung tamajungba kümlü ta aoba teimba angur. Süra koba yimtsungbo senso candidate shimer ruling nung liaka longjema jangratema aliba angur?

Putu menden nung alirtem asoshi arogo nung tenzük teinyaktsü tulu lir. Hau, arogo aser state pangdak balala beshia aser jembia aruba tejangja lir. Arogo aser state pila inyakbaji tongtipang, aji saka pangdak nung alir ajakji arogo nung züngsem tajung kaka lir. Anungji, arogoi pei züngsemtem, shirnok yimtsung putu menden aser sorkar tenzükba pangdak nung ali, parnok dang parnoki inyakba wadangi Tsüngremi mulungba aser Tsüngremer tajaba mapa ta ashitsü aser sayutsü tongtipang lir. Alima yimsüsüba maparen aser arogo tenzükba wadangi Tsüngrem tsüngdang kecha tepila mali ta tangatetba agütsütsü iba putu-i nungdaka kümogo.

Alima nung temenen dak alaka ajongaji temeshi aser Tsüngremi tenyaba maparen ta angatetdaktetsütsü asoshi arogo nung tenzükertem akok tashi lemang balala bushia putu menden yimsüsürtem aser sorkar pangdak nung alirtem ajungshitsüla. Tamanger tsüngda nung telongjem aser ama-litep (inclusiveness) kaa, pei teinyaktsü shilem Tsüngrem tsüngdang pei khuret angateta inyakba alima lenirtem alimai nungdaker. Arogoi joko putu menden nung alir kisung tang dang masü saka administration nung alirtem, policy makers tem, legislature nung alirtem ajunga dang nenoka ya Tsüngrem lar ta shitetsü joko mapang tongja tongogo.

**Sensaksema Nungi Tongtipang ola kar:**

1. Clean election takok mongotetba küliji lanurtem mapa manguba (unemployment) kesung ya dang masü saka state ka nung budget ana aliba ajanga lir. Arogoi iba tim masüba mapa anema ola adoka nokdangtsü tenungdaktetsü lir.
2. Senso candidate shimba ajanga "my vote, my rights" samadaktetsür aser ibai democracy principle anema lir.
3. Iba ama kanga dang temenen jateta adoka, ochi mashi aser süpokrem agi asen lima mekütpanger aliba mapang ka nung arogoi alima yimsüsüba nung Tsüngremer mulungba atalokdakja nübortem Tsüngremi mulungba nung anitsü tetemsü mapangji tang lir.
4. Shingai nisung ka indang vote aoyatsü makok aser shibai pei indang masüba vote agir iba mapaji Teyanglur anema inyakba mapa ta züngshitsüla.
5. Asen lokti aser arogo nung ajangshiba timtem aser tebilemetsütem asoshi Tsüngrem O dangi meyiptsü kanga nungdaka kümogo. Tsüngrem O ajanga atangji lemang sayutsü aser asen sasa taratet dangi anitsü nungdaker.
6. Linük nüjiso asoshi inyakertem election mapang amoka shilem agibaji Tsüngremi mulungba masü aser Tsüngrem o anema ta arogoi tasü ita ola adoka nokdaktetsü nungdaker.
7. Candidate shia dang, aser party shia dang ni/onok adokra küm pungu yamai inyaktsü ta nangzükba inyaktet asü meinyaktet public audit akatsü tim. Ibai arogo aser yimtsung yimsüsüri election agitsü declare süli tasü ita asüngdangtsüla. Nangzükba ama lokti asoshi meinyakteter tanaben meshimtsüla.
8. Candidate shirnoki meyongnem alitsü merangdir item candidate-temji arogo aser yimtsung putu menden lungjemer tasü ita aitsütsüla aser item nübör lokti lenir asütsü meshitsüla.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## England nung kibong katibo Khristmas ki sobutsü inokogo



Tracey Geach aser lar tanur pezü noksa nung angur.

**October 10, 2021:** Küm shia tanur pezü tetsü kati October ita nungbo Khristmas ki sobutsü inoker aser taküm-a Khristmas atongtsü ano anogo 78 lia lai Khristmas ki sobutsü inokogo.

October 08, 2021 nü, Tracey Geach-i Channel 4 nung shilem agiba mapang nung lai iba sentong reprangertem dang lar kidang Khristmas sobutsü inoka aliba sayu.

Arrshi küm 34, Tracey-i TV presenter, Steph McGovern den live link ka ajanga jembiba aser la den tetsü Mandy-a liasü.

Cornwall (England) nungi live jembidang Tracey-i, "Kütsü iba (Khristmas ki sobutsü jelia inokba) ya

tenzüka liasü. Onok tanur asüandang nungi lai yamai inyaka aru," ta metetdaksü.

"Kütsü inyaka aruba ama ni aser ozü chirnurtemia yamai inyaka arur aser iba ya onoki jangrar," ta laisa ashi.

Tetsü Mandy-ia, la amitsür ka asübayong lai lar chirnurtem atema tangar dang nungi balaka inyaka aru, aser iba mapang nungjagi lar kibongi iba ya bentshia arur," ta ashi.

Küm shia Tracey-i September ita tatembanglen mesüra October ita tetenzüklen tashi nungbo Khristmas ki sobutsü inoka arur.

Takumbo lar kidang Khristmas süngdong metong nung süklep 8 yanglu aser baubles 200 den light set 5

inok. Lai taküm küm atema Khristmas sobutsü theme ji 'purple' shim.

Laisa kidang amshiba paper plates aser cup tejen agi nativity scene yanglu aser spoon aika amshia mesü yanglu.

La kima süngdong pezü lir aser süngdong ka nungbo sentsü temesung aser temeren agi Khristmas sobutsü inok.

Steph-i, nenoki Khristmas sobutsü kanga jelia inokba atema nisungtemi kechisa ashir?, ta asüngdangba langzüdang Tracey-i, "Tebilemba balala ashir, kari tajung ashir aser kari tamajung ashir. Pelaa alitsüla. Onoki shinga meyrutsür aser onok pelaa alir," ta ashi.

## SGPC-i Punjab nung Khristan missionary tem anema inyaker

**Amritsar, October 10 (Agencies):** Tawa Shiromani Gurdwara Parbandhak Committee (SGPC)-i Punjab nung Sikh nung Khristan yimsü dangi meyipba nokdangtsü atema maparen ka tenzüko, ta osang ka ajanga metetdaksü.

Punjab nung Khristan missionary temi Sikh nung Khristan yimsü dangi meyipdaksüba video balala social media nung kanga prokshiba sülen Sikh nungertemi parnok yimsü kümzüksü atema Sikh tongti tentet (SGPC)-i kecha meinyakteter, ta aija liasü.

"Ghar Ghar Andar Dharamsaal (ki shia temeshi tesem)" omen nung ajemdaker SGPC-i Khristan sayutsüngerterem aser missionary temi inyakba ama inyakba den külemi Sikh literature aser tesayuba poktsü atema maparen tenzüko.

"Iba campaign ajanga Sikh nung pei tamang jenjang takangba akümba dang masü saka lanurtemia pei putiotsü aser sobaliba atema nüma atangtsü," ta SGPC tongti, Bibi Jagir Kaur-i metetdaksü. Iba campaign kübok sayutsüngerterem team 150 (team shia sayutsüngerterem tenet) yimsüng balalai yokogo.

Iba campaign kübok team 150 jagi yimsüng shia nung hopta kaka amongtsü aser kibong shia dangi oa Sikh nung kaket lemstsü. Nikongdang parnoki tanurtem gurdwara nung adenshidaksüba sülen gurbani (ken) sayuba den Sikh nung putiotsü, sobaliba aser tangatetbatem sayutsü.

"Iba mapatong ya Khristan sayutsüngerterem mission raksatsütsü nükjidong nung tenzüker. Onokisa Khristan yimsü ang meyipalirtem den jembitsü aser Sikh nung ka ama nüma tanga alitsü atema mepishitsü," ta SGPC tongti sayutsüngerterem, Sarabjit Singh Dhotian-i metetdaksü.

State nung Sikh nung dang masü saka RSS densema Hindu tentet balalala state nung Khristan missionary temi nisung aika Khristan yimsü dangi meyipdaksüba atema tebilemstü akar.

Akal Takht lenir, Giani Harpreet Singh-i, bendang linüktem nungi senotsü agütsüba amshia state nung tamangba yimsü meyipdaksür, ta aija liasü.

Singh-isa, "Sikh nung tanga yimsü dangi meyipdaksüba ya tebilemstü khuret ka kümogo. Onoki tangar dang onok yimsü

agizüksü majungshir, anungji ozü yimsü amangertem dang tanga yimsü agizüksü atema ajungshitsü asoshi shinga dak temeden mali," ta ashi.

Ajisüaka Punjab region nung Khristan tongti putir Emmanuel Masih-ibo, item osang ajungaji tai, ta shiogo.

Emmanuel-i, "India linük temzüng ajanga pei yimsü indang sayutsüngerterem atema senso ajak nem temeden agütsür. Tanabuba nung, Sikh nung mesüzüka Khristan yimsü dangi meyipdaksür, ta aitsüba khenyongi tiyazü," ta metetdaksü.

"Punjab nung Khristan nütsüng tajemba lir aser Singh nung nütsüng timba, anungji kodaser onoki tashiyim amshia yimsü meyipdaksütsü? Punjab nung Khristan timbaka sensakertem lir, anungji kodaser onoki sen agi tangar mesüzüksü. Kari state nung yimsü balala tsüngda telemsa adokdaksütsü meranger," ta Khristan lenirisa metetdaksü.

2001 census nung Punjab nung nütsüng shilem 59.9 bo Sikh nung liasü aser nütsüng shilem 1.2 dang Khristantem liasü. 2011 küm tashi nung Khristan nütsüng tera renloka Khristan nütsüng shilem 1.26 kümogo.

## ANO GO ABEN TSÜNGREM DEN

### Kechi agi menendaksür

"Tebangi kechi air aji agi nisung menentsür masü; saka kechi tebang nungi adoker aji agi nisung menentsür." Mathi 15:11

Nisungi nisung mulungjang angutsü tasaktiba ta ajaki jembir aser aji ajungai au ta sütetba o, kechiaser iba tashi ainjibo Tsüngremi meimchir nem agütsüba mangutsü. taküm tepiyong kinungbo-kinungtsü süa liaka mesüra kiyonger/tembar tajung teti külemi wadang ka nung inyaka liakasa, kati bilemba kati mangur mesüra metettsü makoker.

Yisui nisung ka menentsüba indang jembidang chiyungtsü achiba den atishia jembiba, Kechiaser nisungi kechi achir iba jagi nisungbaji menentsür masü, saka kechi tebang nungi adoker aji agi nisung menentsür, tetezü kechi chiyungtsüsa Tsüngremi tachitsü atema yangluogo, aji agi Pai taküm ka sota lidaksütsü asoshi yanglu ta angatetter; saka ajakbo tajung masü.

Tsüngrem oi ashir "... chiyungtsü ajak atangji tajung lir, saka shibai kechi achir iba jagi metsüdaksüra, pa asoshi aji temenen lir. shih achiba süshia, yi ajemba süshia aser kechi agisa ne adianu metsüdaksür itemji meinyaktsü junger". Rom 14:20-21

Yimya agi chidiyungdi nisung talisa, yi ajemer kati kodang yi agi meseptir pa tebang nungi adokba otemji nisungi anganütsüsa masü salepsari mesüra maaksü otem jembiba ajanga tangashirtem mulung aiben menendakja yirudaksür. ano lokti nung tebang telili shirnoki kecha teshisadangba makai o mashi mashi jembir item jagi pa/la adenba loktiji teraksa kümdaksür.

Asen tebang nungi kechi otemsa kazüka yoker itemji kanga nentaka aser meita jembiba taküm ka ka asütsü Kibuba dang teti sarasademi.

### SARASADEM

Kibuba Tsüngrem kü tebang, temeli mazüoktetit tangar yirutsütsüsa jembiba asoshi tatok nangzüker, Nai kü dang taochi sayaungma. Amen

## Plateau State nung Khristan trok tepset aser asem yirutsü

**October 10, 2021:** October 1 nungi October 5 tsüngda Nigeria kübok Plateau State nung Muslim Fulani kiralongrartemi Khristan kati, "Fulani Khristantem amakba mapang nung Khristan trok tepset aser asem yirutsüogo, ta International Christian Concern (ICC)-i metetdaksü.

Fulani telokisa Khristantem meyong alu hectare 13 nung aonsotsü raksatsü, aser ibaji ajanga naira sen million aika takoksa nguogo; alu hectare 8 bo International Christian Concern-i sponsor asüba lu lir, ta ICC-isa metetdaksü.

ICC Farm Manager, Paul-i, "Local zone chairman-i kü dang, anepdang parnok tekülem kidangi aoba mapang nung Fulani teloki parnok kiset shiruru aika alu nungi chiyimdaksüdar osang angashi. Alu hectare 8 nungji azüngken tsünüa liasü," ta metetdaksü.

"Mapang tatsüka tsüngda hectare 8 nung tsünüba aonsotsü raksatsütetbaji ajanga iba ya parnoki jelia asalentong

yanglur inyakba lir, ta jangjar," ta paisa ashi.

ICC den jembidang Khristan kati, "Fulani kiralongrartem onok meyong Tenla kidangi aru. Parnoki onok lu nung kiset shiruru chiyimdaksü. Ozü nisung asem parnok nokdangtsü atema ao, ajisüaka parnok ket nung prangpong liasü. Tia maka par asemrpong Khristan asüba ajanga iba anogo nungjisa tepset," ta metetdaksü.

Tamalena Fulani telokisa ICC-i sponsor asüba alu raksatsüogo.

Paul-i, "Ni Nigeria nung lenirtem dang nüburtem aser kiojen kümzüksü atema mepishir," ta metetdaksü.

October 1 nü iba yim nungjagi kilometer 18 shi pilar aliba tesem ka nung Fulani teloki aluyimer Khristan ana khaseta liasü. October 2 nüa Khristan ana dak injang khaloktsüba sülen ka mekümzükteti asü aser ka mejungi yirua hospital-i anir ao, saka rongsen peria maliba agi hospital toktsür kidangi ogo.

**OLONG PAITEP # 5963**

1			2			3			4	
			5		6		7			
8										
			9							
	10									
									11	12
			13				14			
15						16				

<b>TIPILEN</b>		<b>LANGTSÜNGLEN</b>	
1. Anenzükdak ki	- (5)	1. Reprangdaksü	- (4)
3. Asür mangyimba	- (5)	2. ___ ur	- (3)
5. Temulung nung shisadang	- (5)	4. Kiojen yangludak	- (6)
8. T ___ lu	- (3)	6. _____ ait	- (7)
10. Takdang temalen	- (9)	7. Nagaland nung ayong ka	- (5)
11. Tesa ___ a	- (3)	9. Küm kasa purtem	- (5)
13. Ajungbena temulungjang tongtonglatsü atu	- (5)	10. Tetsüng tajemtdak	- (6)
15. Tejen lai nung tesayur	- (5)	12. _____ adenshi	- (4)
16. Tsüngsak-mopung	- (5)	14. Tsünüsenbongtsü adokdak	- (3)

**OLONG PAITEP # 5962 TELANGZÜBA**

<b>TIPILEN :</b>	<b>LANGTSÜNGLEN :</b>
1. Kasa, 6. Rangben, 7. Mait,	1. Khu, 2. Süjak, 3. Onük, 4. Oba,
9. Poktet, 11. Ati, 13. Atasa, 16. Rür,	5. Anü, 6. Ratet, 7. Mozü, 8. Ita,
17. Rajang, 20. Lanu, 24. Nüngjem,	10. Tar, 12. Tinu, 14. Salem, 15. Aja,
25. Süra.	18. Anünü, 19. Taju, 21. Ano, 22. Onü,
	23. Kua.



**KIBUBA O MOJING NA AS ATEPER**

**Kibuba** : Hi,Mojing na kümdangangno !  
**Mojing** : Ni kechisünung kümdangtsüba?  
**Kibuba** : Na kümdangangja,nai meimchir tamanger talisa  
 Naga nunger ashiokja raksatsüba ni angur,Anungji  
 na kanga kümdangangno,  
**Mojing** : Kibuba,naang kümdanga jembiangma,Ni Nagalima  
 nung senzütsü kanga tsübur aser akseter.  
**Kibuba** : Na kechiba Naga nunger tsübur aser akser?  
**Mojing** : Ena,Ni mapa tamajung inyaka parnok raksatsütsü  
 bilemer Naga limai odangnung meyiper parnokiang  
 mapa tamajungji kanga agi toluba inyaka liasüji ni  
 kanga tsübuatok aser akseter, Sala!!!!  
**Kibuba** : O Naga nunger !!!!!  
 Lilir : I. Kilang Ajem, Indisen,Dimapur.

**TANÜBO NAI LANGZÜANG**

- Q. Linük kobai 4buba Biennial Maritime Series nung shilem agi?  
 A. India and Australia      B. India and Japan  
 C. India and Srilanka        D. Australia and Japan

(Taruba adok nung onoki langzüksü)

YASHI ADOK TELANGZÜBA : Oct.06

**AO OSHI ANGAZÜKDAK:**

TANÜ ANGAZÜKTSÜBA OJANG



**Lanlia**  
 (interj) kanga junger ta ashiba (well done)  
 \* Asen mapa nung tangari lanlia ta ashitsüsa nendaka inyaksüla.

**Lanso**  
 (n) Longmi luyang nung renra süzküka rongnü yanglur amshiba  
 (decorated bamboo spear)  
 \* Moatsü benjong nung tanurtemi nü melena lanso yanglua amshir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



1. Tenüng : .....  
 2. Tasoba anogo: .....  
 3. Küm : ..... 4. Class : .....  
 5. School : .....  
 6. Talidak : .....  
 7. Salem osang : .....

**NAI-A YA METETTER MA**

**1956 ASER 2020 KÜM TSÜNGDA 'BALLON D'OR / FIFA BALLON D'OR' KA DANG NUNGI TIMBA ANGUR ASAYAR KAR:**

Asayar	Ballon d'Or Award
1. Lionel Messi (Argentina)	6
2. Cristiano Ronaldo (Portugal)	5
3. Johann Cruyff (The Netherlands)	3
4. Michel Platini (France)	3
5. Marco van Basten (The Netherlands)	3
6. Alfredo Di Stéfano (Spain)	2
7. Franz Beckenbauer (West Germany)	2
8. Kevin Keegan (England)	2
9. Karl-Heinz Rummenigge (West Germany)	2
10. Ronaldo (Brazil)	2

**SUDOKU # 6004**

		3		1	5	7	9	
	8	6			9	2		1
			2	6				
9	2	4	6					
		7	4	3	1	8	2	9
	1		9			6		
7			5	9			8	2
	3	5		8	2			
8		2		7	6	4		

**TELANGZUBA # 6003**

	8	4	9	2	7	1	6	5	3	
	6	7	5	3	8	4	9	1	2	
	1	2	3	6	5	9	7	4	8	
9	7	8	2	9	3	5	4	6	1	
	9	6	1	8	4	7	2	3	5	
	5	3	4	1	2	6	8	9	7	
7		3	9	7	5	6	2	1	8	4
	2	5	6	4	1	8	3	7	9	
8		4	1	8	7	9	3	5	2	6

**OJANG LUTEP # 5549**

- PAMAJI :   
 INKLYAI :   
 IKERNYABO :   
 GARTANI :   
 SÜSISHMASHITA :   
 EMTAT :   
 SHTAI :   
 GAJUN :   
 AKTSINYÜ :   
 RANMEGANG :

**OJANG LUTEP TELANGZÜBA # 5548**

MEZÜNGBO JUNGA INYAKA TENZÜK SAKA  
 TATEM NUNG KANGA MEJUNGI INYAKSA

**TAN HOPTA ATEMA - KOMA SÜLA ?**

Q. Asenok arogotem nung tetsürtem nema sannükla dang masü saka sannükba mapa inyakdaksü nunga koma süla ?



Varanasi, October 10, 2021: Sangküm Uttar Pradesh nung assembly election agitsü lia Amongnü Varanasi nung Congress General Secretary, Priyanka Gandhi-i 'Kisan Nyay' rally nung jembiba noksa nung angur.

### Aluyimertem tepsetba atema PM Modi-i ola madoker: Rahul Gandhi

**New Delhi, October 10 (Agencies):** Amongnü Congress Party lenir, Rahul Gandhi-i, Lakhimpur Kheri nung aluyimertem aser BJP nung inyakerkem tepsetba atema Ato kilonser, Narendra Modi-i ola madoker; osetsüset jenjang tali atuba, totzü jenjang atuba aser linük nung mapa manguba tebilemtsü onüktem atema pai ola madoker, ta aitsü. Wayanad MP, Rahul-i Hindi oshi nung twitter ajanga, "Osetsüset jenjang atuba, totzü jenjang atuba, mapa manguba

tebilemtsü, aser aluyimertem den BJP nung inyakerkem tepsetba atema Ato kilonseri ola madoker," ta metetdaksü. Ano tanga osang ka nung, Amongnü Varanasi nung election rally ka nung jembidang Congress general secretary, Priyanka Gandhi Vadra-i, "Ato kilonser Narendra Modi-i Lucknow bo semdangtet saka Lakhimpur Kheri bo mesemdangtet," ta aitsü. Lakhimpur Kheri nung atalokba ken o dak sendakba nung Union Minister of state for

home, Ajay Mishra cabinet menden nungi anentsüla; takoksa angur kibongtemi sen masü saka ochi temeden aginer, ta lai ashi. "Sonbhadra tatalokba ken o nung ochi temeden mangu. Unnao mesüra Hathras tatalokbatem nung ochi temeden mangu, aser tang-a kasa ataloker," ta lai ashi. "Ochi temeden nung ajemdaker India-i nüchiso angu saka Uttar Pradesh nungbo takoksa angur kibongtemi ochi temeden angutsü atema teimla mali," ta laisa ashi.

### Parliament Standing Committee balala nung tasenpurtem shimok

**New Delhi, October 10 (Agencies):** Lok Sabha Speaker, Om Birla-i Rajya Sabha Chairman M Venkaiah Naidu den jembitepa department balala dak sendakba Parliamentary Standing Committee balala tentetshio. Congress lenirtem- Shashi Tharoor, Anand Sharma aser Jairam Ramesh nungerbo maneni information-technology, home affairs aser science & environment parliamentary standing committees nung maneni chairman inyaksü. Personnel, Public Grievances, Law and Justice Parliamentary committee nung BJP lenir Sushil Kumar Modi-i Bhupender Yadav melenzükogo, kechiyong tawa Yadav minister shima liasü. Lok Sabha aser Rajya Sabha

secretariats ajanga ashiba agi, tang yanglushiba committees ya 2021-22 kümsük atema asütsü. Finance Parliamentary committee nung BJP MP Ravi Shankar Prasad züngsem shim aser Personnel, Public Grievances, Law and Justice nung Ramesh Pokhriyal Nishank züngsem shim. External Affairs Parliamentary committee nung BJPMP, Prakash Javadekar züngsem shim. Prasad, Nishank aser Javadekar nunger ya taküm July ita nung ang Union minister menden nungi anendakja liasü. PC Gaddigoudar Agriculture Parliamentary Committee nung Chairman shim, BJP MP Rakesh Singh Coal & Steel Committee nung Chairman shim aser Rajiv Ranjan Singh (Lalan Singh) Committee on Energy nung Chairman shimogo.

Shiv Sena nungi Rajya Sabha züngsem asemprong committee tasen nung shimok. Sanjay Raut Defence nung aliba External Affairs nung shim, Anil Desai Coal & Steel committee nung aliba Commerce Committee nung shim aser Priyanka Chaturvedi Commerce nung aliba Transport, Tourism & Culture committee nung shimok. Yamaji Chhaya Verma (Congress)-a Agriculture nung aliba Social Justice & Empowerment nung shim, Manoj Kumar Jha (RJD) Railways nung aliba Labour nung shim, Shaktisinh Gohil (Congress) IT nung aliba Transport nung shim aser Sasmit Patra (BJD) Education nung aliba Personnel, Public Grievances and Law & Justice committee nung shim.

### India nung ano nisung 18,166 dak Covid putet

**New Delhi, October 10 (Agencies):** Tesüiba ghonda 24 tsüngda India nung ano nisung 18,166 dak coronavirus putet aser ibaji tesüiba anogo 214 tsüngda anogo ka kija nung ishitiba putetba lir, ta Amongnü Ministry of Health & Family Welfare-i metetdaksü. Tang tashi nung India nung nisung 3,39,53,475 dak coronavirus putetogo aser tang teshirangdakpur 2,30,971 dang kümogo. "Centre aser States/UTs longjemer inyakba ajanga tesüiba anogo 105 tashi anogo shia nisung 50,000 den tajemba dak iba tashidak puteta arudar," ta Health Ministry-i metetdaksü. Tesüiba ghonda 24 nungsa linük nung coronavirus agi

shiranger 214 süogo aser tang tashi nung iba tashidak agi asür 4,50,589 jungogo. Tang tashi nung iba tashidak agi shiranger 3,32,71,915 anepogo aser shirangertem anepbaji coronavirus caseload nungi shilem 97.99 lir. India nung iba tashidak agi shiranger timba asüba state temji Maharashtra (nisung 1,39,514), Karnataka (37,875), Tamil Nadu (35,768), Kerala (26,173), Delhi (25,088), Uttar Pradesh (22,896) aser West Bengal (18,894) state tem lir. Tesüiba ghonda 24 tsüngda linük nung coronavirus vaccine dose 66,85,415 agütsüogo aser tang tashi nung vaccine dose ajak senteper crore 94 dak tema (94,70,10,175) agütsüogo.

### Union Minister, Ajay Mishra'er jabaso Judicial ket nung agütsüogo



Lakhimpur Kheri nung rara adokba ken o dak sendakba nung Amongnü Lakhimpur Kheri district nung Union Minister of State for Home Ajay Misra'er jabaso, Ashish Mishra crime branch office nungi magistrate dangi anir aoba noksa nung angur.

**New Delhi, Mongputeni/October 10 (Agencies):** Lakhimpur Kheri nung rara adokba ken o dak sendakba nung Honibar aonung Union Minister of State for Home Ajay Mishra'er jabaso, Ashish Mishra anogo 14 atema judicial ket nung agütsüogo. Aluyimer pezü densema nisung 8 asüba ken o dak sendakba nung Ashish dang ghonda 12 asügangyaba sülen crime branch office nung medical team kati Ashish temang tendang, iba sülen judicial magistrate ket nung agütsü, ta prosecution officer SP Yadav-i metetdaksü. Lakhimpur Kheri nung rara adokba sülen aluyimertemi, aluyimertem tsüksetba gari asem rongnung gari ka nungbo Ashish Mishra mena liasü ta shia pa anema ka benoka liasü. Iba sülen tesüiba anogo aika aluyimertem lenirtem aser opposition party temi Mishra tekara nung aputsü takhangba agüja liasü. Kasa tatalokba nung aluyimertemi tejashi nung BJP nung inyaker ana aser gari driver ka densema tepset; iba dak alia osangbener Raman Kashyap-a asü. Ashish Mishra anepdang 10:30 ako meta SIT

matsügangdangi arua liasü aser anügangdang 11:00 ako nung pa apuba sülen crime branch office nung SIT-i pa dang asügangdangyaa liasü. Arrshi küm 35 shi, Ashish Mishra-i pa tebu indang Kheri Parliamentary constituency nung yimtenren dak sendakba maparen achaayanger. Par jabaso dang asügangdangyaba mapang nung Ajay Mishra-a Lakhimpur nung aliba pa indang MP office nung liasü. Hokolbarnü Supreme Court-i Uttar Pradesh sorkar dang iba ken o nung tai tonglokja alisang tang tashi mapuba atema arüja liasü. Aluyimertem unions-i tentetba Samyukta Kisan Morcha (SKM)-ia, iba tatalokba ya jelia asalentong yanglur inyakba lir, anungji tekara nung minister aser par jabaso naprongla aputsüla, ta takhangba agüja liasü. Honibarnü New Delhi nung osangbenertem senden ka nung jembidang SKM lenir, Yogendra Yadav-i, "Ajay Mishra cabinet nungi tangsa anentsütsüla aser tesünep raksatsüba, nisung tepsetba aser asalentong tamajung yangluba atema aputsüla. Iba ken o nung pai aibelenertem kümsük," ta metetdakja liasü.



October 10, 2021 nü Lucknow nung party balala nungi lenirtem BJP nung adenba sentong nung tangokba noksa nung angur. Kasa noksa nung UP BJP Tir, Swatantra Dav Singh-a angur.



Rome nung longkak aitiba mapang nüburttem Piazza del Popolo square nung adenshia aliba noksa ka yangi angur. October 15 nungi tenzuka public aser private sector nung inyaker Italy nungeri mapai aoba mapang COVID-19 health pass sayutsüla, ta sorkari ozüng agütsüba anema Rome nung nisung meyrirjang aika adenshia longkak aita liasü.

### Russia indang Tatarstan region nung tayimtsü ka tsükok

**Menzelinsky, Mongputeni/Oct. 10 (Agencies):** Russia indang Tatarstan region nung tayimtsü ka tsükokba sülen nisung 16 asü aser trok yiru, ta osang ajanga ashi.

Menzelinsky yimti anasa tsükokba tayimtsü nungya parachutists 20 aser tayimtsü ketdangsür ana mena liasü. Nisung trok temang jenjang kangasa mejungi lir, ta Health Ministry ajanga ashi. Iba lendong ya anepdang 9:23 ako (par mapang) meta ataloka liasü.

Iba tayimtsü ya Let L-410 Turbolet liasü, koba twin-engine short-range transport aircraft ka liasü. Iba tayimtsü ya Menzelinsk yimti nung aeroclub ka indang lir, ta TASS news agency ajanga ashi.

Training atema cosmonauts temi iba tesem ya amshir aser aeroclub ajanga local, European aser world championships amala ayongzuka liasü, ta club indang director Ravil Nurmukhametov-i ashi.

Bushisüngdangba maparen ka metembang aliba mech sorkar meyong Cosmonaut Training Facility ajanga aeroclub den tesendaktep khen atema agiena lir, ta osang ajanga ashir.

Iba tayimtsü nung engine kati mapa meinyak akum südi, ta ashi.

Ministry ajanga iba lendong atalokba indang noksa prokshiba nung tayimtsü ya ana kuma raksar liasü aser tayimtsü tejaklen kanga mejungi jisar liasü.

Russian aviation safety

standards ya tang tajungba lir, saka region tezülen tayimtsü tejen lendong ajuruba ya tang tasen masü.

Taoba ita Russia anüdoklen tesem tezülen Antonov An-26 transport plane tejen ka tsükoka nisung trok asü.

July ita Kamchatka nung Antonov An-26 twin-engine turboprop ka tsükokdang iba tayimtsü nung mena alir nisung 28 prongla asü.

Iba linük nungya mapang shia timtem balala ajurua tayimtsü lenmang melentsüsa akumer aser ajungbena ali nung anentsüsa akumer.

Russia linük ya onsara tulu lir aser nisung malidak tesemtem, talisa Arctic aser Far East nung tzüngsang-mopung timba majung alir.

### China matsüngdang Taiwan mapudaktsü: Tir Tsai Ing-wen

**Taipei City, Mongputeni/Oct. 10 (Agencies):** China-i aginüba ama sorkari mapudaktsü aser democracy wazüka ayutsü atema asetkong indang defence tashi itshitsü, ta Taiwan Tir Tsai Ing-wen-i ashi.

China Tir Xi Jinping-i pei sasa yimsü asüba litsü (Taiwan) den yimjung nung tanaben lungjemshitsü atema inyaktsü, ta nangzükher anogo ka lir Tsai-i Deobarnü iba tasü-tait o ya jembia liasü.

China-i par litsü ta jembiba Taiwan ya Beijing yimsüsüba agizüktsü atema mitkar aser yimtenren nungi tebilemstü tali agütsür.

Item rongnung China nunger air force-i Taiwan indang air defence identification zone telungi aitiba dena lir. October tetenzüklen kija nunga Beijing-i mitkar indang tayimtsü 149 shi iba asetkong anasai yok, anungji Taiwan indang fighter jets tem ayamesotsüsa akum aser linük balalai süoki ia khuret aben.

Central Taipei nung Taiwan indang National Day nungtem nung rally ka alidak jembiba mapang, Taiwan Strait ajunga nung tensa tajungba akumtsü imlar, ta Tsai-i ashi.

Lar sorkari junga mebilemdangi meinyaktsü saka Taiwan nüburi apudaktsü

khenyongi mepungmangtsüla, ta lai ashi.

"Asenok atema China-i yanglua yutsüba lenmang nung jajatsü atema shinga nema tashiyim agi Taiwan mejadaktsütsü atema Taiwan-i maneni asen linük defence tashi itshitsü aser asen sasa asen kumzuka ayutsü atema temolungtetba sayutsü," ta lai tir indang office kima nungi ashi.

"Kechiaser China-i yanglua aliba lenmang yagi Taiwan nunger sadoksayima democratic yimya nung alitsü mesayur mesüra asen nütüng yongsük million 23 nem tashi temeden magütsür."

Taiwan dang ya Republic of China (ROC) ta ajar, koba mainland China tzükum nungi kilometre 161 shi pilar democracy yimya nung yimsü asüba asetkong ka lir.

1949 küm Chinese Civil War tembangba sülen communist temi People's Republic of China ya Beijing nung tentet aser takok mangur nationalist tem ya Taiwan-i jena oa yangji sorkar ka amenokba sülen pei sasa yimsü süa arur.

Taiwan ya de facto independence süaka Beijing-ibo par dak nungi razüka aoba province ka ama repranger aser Hong Kong nung amshiba ama

Taiwan nema 'one country, two systems' model of autonomy maongka agütsür. Saka Taiwan nung party tulu ajungai ibaji magizükher, Talisa China-i taoba mapang British kübok aliba Hong Kong nung security maparen balala tenzükba sülen tali ashishir.

Küm pongu tejakdang Tsai indang election agiba sülen tensa tamajungba akum, kechiaser Xi yimsüsüba kübok Taipei den osangtsüsang ajunga raksa. Beijing-i arishi küm 65 tain Tsai ya separatist ka lir, ta ashir, shibai Taiwan ya "one China" nung adentsü memolunger.

China den jenjang kasa nung jembishinütsü renema lir, ta Tsai-i Deobarnü nenshia ashi.

### Yemen nung nisung 5 pokset

**Sana'a, Mongputeni/October 10 (Agencies):** Aden Angh dak rangloker gari nung bomb inoker pokdaksüba lendong nung nisung pongu poksetogo, ta security sources kati Deobarnü metetdaksü. Angh ya alima kintemi agizükher aliba sorkar nung shilem ka lir.

Angh Ahmed Lamlas aser sorkar minister Salem al-Socotri na iba lendong nungi jenbuogo. Parnok mena aliba garitem tarensena aoba mapa iba bomb pokdaksü saka tenaprongla jenbo, ta source-isa ashi.

"Ketdangsürtem mena aliba convoy ka süia aoba mapang Al-Mualla yimtung nung gari nung bomb ka inoker pokdaksü," ta Yemeni security source kati AFP dang ashiba den lendong nung asürtem ya iba convoy nung densema liasü, ta metetdaksü.

Iran-i teyari agütsüba Huthi telungpurtemi atüngtokba sülen 2014 küm centre sorkar ya linük yimtiba Sanaa toktsür Aden nung oa amenok. Huthi telungpurtem aser Saudi-i teyari agütsüba Yemeni sorkar na küm aika raraa arudar.

Küm tem tsüngda Yemen anüolen tip nung alima kintemi agizükba sorkar aser iba tesem nung aliba telungpurtem tsüngda mangatetep adoka arudar, kong

prangbong hadir balala amshia azütokshia raratepba densema lir.

2020 küm December ita Southern Transitional Council (STC) nungi ketdangsürtem cabinet nung aniokogo. Tashi lemsateptsü mulungtepba sülen iba jenjang ya agia liasü.

Lamlas aser Socotri naprongla ya STC personnel lir.

STC-i South Yemen nüjiso tanaben amenokshitsü atema nokdaka arudar. Iba tesem ya linük balaka liasü saka 1990 küm north den lokteptsü.

Centre sorkar aser nüjiso bushirtem tsüngda tebandang liaka telok anaprongla ya Huthis den raratsü atema longjemer lir.

Kasa mapang nung Yemen kübok Arabian Peninsula ya Al-Qaeda nunger tamendakdak lir, shirnoki linük sorkar den sendaktepba aliba sepaitem mapangshia maka arudar.

Yemen nung lokti balala tsüngda mangatetep adokba ajanga nüburttem meyrejang aika süogo, kong civilian tem timba densema lir. Iba den ano nüburttem million aika pei aliba tesem toktsür tekümzükba bushi jenshiogo. Yemen nung mepetmesü ya United Nations-i alima nung humanitarian timtem tamajungtiba lir, ta shiogo.

### Malaysia-i vaccine agir alirtem atema tenokdangba salatsü

**Kuala Lumpur, Mongputeni/October 10 (Agencies):** Malaysia nung nisung tain shilem 90 nem COVID-19 vaccine agütsütsü atema nükjidong yur aliba atongba sülen sorkari Deobarnü linük nung vaccine dose anaprongla agir alirtem atema tenokdangba agütsür aliba salatsüogo.

Ato Kilonser Ismail Sabri Yaakob-i, sorkari Malaysia nunger vaccine dose anaprongla agir alirtem temelaba agitsü atema mebenoki bendangleni odaktsütsü atema temelaba agütsütsü mulunga agizükogo, ta ashi.

Iba ozüng tasenba ya Hombarnü nungi benoka inyaksangshitsü.

Sorkari endemic COVID-

19 phase-i aitsü atema renemshidar, kong tashidak menatepa aoyonga linük ajunga mokdanga mayutsü, ta Ismail Sabri-i osangbenertem den sensaksemba mapang metetdaksü.

"Covid den alitsü atema asenok sasa angazüktsü nüngdaker, kechiyong COVID ya ajungabo mesamadaktsütettsü akok," ta pai ashi.

Linük nung arishi küm 12 aser 17 tsüngda alirtem densema nütüngyongsük million 32 aliba nungi shilem 65 nembo Honibarnü tashi nung vaccine dose anaprongla agütsüogo.

Southeast Asian linük nung ya coronavirus tashidak agi nisung million 2.3 dak kongshioago aser iba tashidak agi nisung 27,265 süogo.



Prague, Czech Republic nung center-right Spolu (Together) coalition lenir Petr Fiala busemertem pelatepba noksa ka yangi angur. Bolling station shilem 99.7 nungi vote azüngba sülen liberal-conservative telok asem coalition, Together ajanga vote shilem 27.7 nguteta Babis' ANO (Yes) party madak takok nguogo, ta Czech Statistics Office ajanga sangdong. Yes party ajanga vote shilem 27.2% nguteta liasü.

## Security Forces-i sentong balala ayongzük



**Dimapur, Mongputeni/ October 10, 2021 (TYO):** Honibarnü (09.10.2021) HQ IGAR (North) kübok Assam Rifles indang Kohima Battalion-i Chakhabama, Kohima District nung Career Counselling lecture sentong ka ayongzük, ta sangdong ajanga metetdaksü.

Lanurtem Assam Rifles aser Army nung adentsü asoshi ajungmesotsü nükjidong yur, "Education for Progression" nung ajemdaker iba sentong agia liasü.

Iba sentong nung, Government High School, Sakhabama nungi tesayur asem densema kaketshir 28 agi shilem agiogo. Kaketshirtem school züngtemar sülen mapa maongka balala indang parnok dang meteta lidaktsütsü asoshi iba lecture sentong team-i jembiogo.

Iba lecture temer sülen, rara dang amshiba Prangbong aser injang sayuba sentong ka agia liasü, kong kaketshirtem dang Assam Rifles-i amshiba prangbong injang balala

sayuogo. Assam Rifles aser Armed Forces nung adentsü asoshi ajungmesotsü nükjidong yur iba sentong ayongzükba atema sentong nung shilem agir tesayur aser kaketshir temi Assam Rifles dang pelaba metetdaksü.

Kasa anogo (09.10.2021) HQ IGAR (North) kübok Assam Rifles indang Tuensang Battalion-i Baptist High School, Monyakshu village, Mon District nung Guidance aser Awareness sentong ayongzükba liasü.

Armed Forces indang meteta lidaktsütsü asoshi, Tuensang Battalion Assam Rifles-i Baptist High School, Monyakshu village indang kaketshirtem den shisadokten sentong ka ayonga agiogo.

Iba mapang, kaketshirtem dang Sainik School nung azüngba tajangzük aser iba school nung azüngertem officer ka ama akümtsüsa maongka balala indang metetdakja liasü. Tesayuba agütsüba den külemi, armed forces indang academic

balala aser parnoki ajangzükbatem indang video tem kaketshir dang sayua liasü.

Iba sentong temer sülen, merükmejuba indang nung lecture sentong ka ayonga agia liasü. Tuensang Battalion-i ayongba sentong nung, Government Middle School Monyakshu village aser Baptist High School Monyakshu Town nungi School Principal, tesayur 23 aser kaketshir 35 agi shilem agiogo.

Maneni, Hokolbarnü (08.10.2021) HQ IGAR (North) kübok Assam Rifles indang Kiphire Battalion-i Jisaji Presidency College, Kiphire District nung awareness cum registration campaign ayonga agiogo.

Lisopur aser lanurtem tsüngda tetsür aser tebur candidate anaprongla atema Assam Rifles nung Tech aser Tradesman post balala nung adentsü ajungmesotsü aser item post atema inyakyimtem metetta lidaktsütsü nükjidong nung iba campaign ayongzükba liasü.

Lanurtem talisa, Nagaland arrtsülen aliba yimtsüng nung alirtem tarutsü tajungba atema Sorkar indang asalentongtem aser inyakyim tem ayimjema lecture sentong ayongzükba atema lanur (tetsür aser tebur) ajaki Assam Rifles dang pelaba metetdaksü, ta kasa sangdong nung shia lir.

## OFFICE OF THE MERANGKONG SENSO TELONGJEM DIMAPUR TENÜNGSANG AGÜTSÜR



Mr. Imtisu Yaden aser Mrs. Narola tena jabaso **Mr. Moalong Yaden**, World Bodybuilding and Physique Sports Championship Tashkent, Uzbekistan nung 5th Position ngua tenüngsang tulu bener arutsü nung, Merangkong Senso Telongjem Dimapur-i Tenüngsang tetushi tulu agütsür.

Tarutsü nunga pai inyakba wadang ajak nung takok ngudakjang tasarasademtsür.

Sd/-  
TAONGNUKSHI IMSONG  
Tir, MSTD

Sd/-  
WATITOSHI LKR  
Tongti Zülur, MSTD

## KROS College nung Freshers Day 2021 mungogo



Kohima, Mongputeni/October 10, 2021: KROS College, Kohima Mr aser Miss Fresher 2021 - Sp. Thejangulie Kuotsu aser Kr. Tatongmongla na külemi tangokba noksa ka yangi angur.

## Swarnim Vijay Mashaal Nagaland tongogo



**Kohima, Mongputeni/ October 10, 2021 (TYO):** Swarnim Vijay Varsh Victory Flame, koba 1971 War nung otsüsütsüsa India-i Pakistan madak takok anguba indang Hon Jubilee benjongmung ka lir, Honibarnü (09.10.2021) iba Flame' Rangapahar Military Station, Dimapur, Nagaland tongogo. Iba Flame tonga aruba mapang, Station nung alir military temi akhüm agüja agizükba liasü, ta PRO (Def) Kohima sangdong ka ajanga metetdaksü.

Iba Flame ya 2020 küm December 16 nü National War Memorial, New Delhi nungi tenzükja liasü.

Honibar anepdang, iba 'Victory Flame' ya Jorhat, Assam nungi tenzük aser anüngdang Dimapur tonga liasü. Iba Flame bener aruba mapang, linük atema taküm bendanga agütsür sepaitem nem tesem balala nung Victory

Mashaal, lisopurtem, tanurtem aser lennirtemi akhüm aser tetushi agütsüogo.

Eden Hospital nungi tenzükba Rangapahar Military Station, Bhagat Stadium nung iba Flame' agizüktsü asoshi sentong renem. Iba Victory Flame agizüktsü asoshi Bhagat Stadium nung sentong ka agia liasü, kong nüburtem, war veterans, veterans, veer naris, tongtibang nübutem aser school tanurtem aruagi denogo.

Iba sentong agiba mapang, War veteran aser veer naris tem nem akhüm tetushi agütsü aser sentong nung tongti tesemdangjerji Wt. Manju Eliyas, 1971 War Shaurya Chakra awardee asür Lt. Col Cyril Jonathan Eliyas indang kinungtsü liasü.

Tenüngsang aser tetushi agütsüba sentong temer sülen, tongti tesemdangjerji Manju aser Senior officer nati anir süngdong atemba sentong ka agia liasü.

Tarutsü anogotem nung, Swarnim Vijay Varsh atema sentong tem talisa wreath-laying ceremony, mini marathon aser 1971 Bangladesh Liberation War nung documentary tem sayutsü asoshi Rangapahar Military Station, Dimapur nung sentong ayonga agitsü, ta kasa sangdong ajanga metetdaksü.

## Alanis Morissette-i UK aser European tour anogo atsülanger

**New York, Mongputeni/ October 10, 2021 (Agencies):** Kentener, Alanis Morissette-i la indang UK aser European tour sentong anogotem atsülangtsüogo.

Alima ajunga asüngba Covid-19 wara ajanga küm ka tashi item show thinena arur sülen, taküm item show agitsü asoshi anogo melenshia liasü, saka 'Ironic' ken atenla Alanis-i, coronavirus tenokdangba ajanga item tour anogo tanaben atsülangtsüsa akümer ta osang jangjatsüogo.

Alanis-i item show atema anogo tasen ano memetdaksü. Alanis indang 1995 küm sayaba kensep 'Jagged Little Pill' sayar sülen küm 25 ajungba nüngtem nung item show agitsü renem, saka Covid-19 tensa mejungi akümiba ajanga iba tour atema aiben anogo atsülangja aruogo.

"Europe aser UK

**Kohima, Mongputeni/ October 10, 2021 (TYO):** Honibarnü (09.10.2021) KROS College, Kohima nung Freshers Day 2021 sentong ayonga agiogo. Iba sentong nung Sp. Thejangulie Kuotsu aser Kr. Tatongmongla nati Mr. aser Miss Fresher 2021 takok ngua liasü, ta sangdong ajanga metetdaksü.

KROS College, Kohima indang Freshers Day 2021

sentong nung formal aser casual round lemsar agi, kong Mr. & Ms. Fresher 2021 title atema tebur 13 aser tetsür 13 agi shilem agiogo. Final round atema tetendanger temi category anaprongla nungi tetokteper tajungtiba pungongo shima liasü.

Iba sentong nung, senior kaketshirtem den külemi fresher temi ken tena aser tsüngsang balala sayuogo, ta kasa sangdong nung shia lir.

ticket agizüktsü. Nenok den ajuruteptsü yongyar aser yaktasa nenok den ajuruteptsü imlar," ta Alanis-i shisem.

Taoba mapang, Alanis-i ni atenba ken rongnung 'Ironic' ya nüngtugu aküm yongjia, 'Jagged Little Pill' kensep nung iba ken inoktsü ni memolungi liasü.

Arishi küm 47 tain Alanis-i, "Iba record nung tasüsa ni 'Ironic' ken inoktsü asoshi khenyongi memolung, ta ashi.

"Nisung aikati iba record nung Ironic' ken inoktsü asoshi mepishiba ni bilemter. Glen Ballard den longjem züluba ken rongnung iba ya mezüng asütsü, koba demo ka ama liasü. Ajisüaka, nüburtemi iba kensü ola kanga sapuadok aser iba ken ya senti ka ama ni mebilem. Tatsüka lir ang, iba ken ya kensep atema track tongtibang ka ama yanglutsü asüa ta yimdangi aru," ta Alanis-i shisem

## Dorians Society-i MTB cyclothon ayongzüker

**Dimapur, Mongputeni/October 10:** Dorians Society, Dimapur-i, tetsür, tebur aser lanurtem (arishi küm 13 nungi 19) atema MTB cyclothon tetoktepba ka October 23 nü ayongzükerogo.

Teburtem tetoktepba nung km 57 ayimjemtsü aser tetsürtem km 25 ayimjema tokteptsü. Iba tetoktepba ya DC office traffic point nung anepdang 5:00 ako nungi tenzüksü aser Multi sports complex, DC Court nung tembangtsü, ta society sangdong ka ajanga metetdaksü.

Tetoktepba ya DC office Police Point nung tenzüksü aser City Tower Junction - Holy Cross Junction - Bata Chariali - Town Hall Police Point - Kuda Village - Lungwiram Junction - Toulazouma - Zoological Park - Singrijan - New Chümoukedima Village -

Sukhovi Gate - Vidima - Kiyeto - Dhansiripar Junction - OTS - Singrijan - Zoological Park - Thahekhu Junction - Thahekhu Village - Signal Basti - Dhobi Nala - Midland longer State Stadium nung tembangtsü.

Cyclothon tetoktepba atema sempet sen 80,000 renemja lir. Osang ajanga ashiba agi, iba tetoktepba ya küm shia ayongzüka asayatsü sentong lir, kong tarutsü nungbo national aser international cyclists temia shilem agitsü imlar.

"Taküm iba sentong takok angutsü atema nenoki teyari agütsütsü imlar," ta ashiba den osang tejangjaba agitsü atema nüburtemi mydorians.in-i log in sütettsü, ta society-isa metetdaksü.

Maneni sangdong ajanga ashiba agi, Dorians Society ya tajangzük angutsü atema

tentetba lokti tentet ka masü aser lokti ajangzüksü atema mapa balala benoka inyakba den parnok nükjidong rongnung kaji saisapong ajungkettsü atema lir.

"Onok nükjidong rongnung kaji state nung saisapong ajungkettsü atema lir. Temang anema alitsü, kaketshitsü bushiba nung temaba jenjang tongtettsü, taküm libaliro angazüksü aser lokti ajangzüksü atema lenla ajak nung renloka ainba tarutsü lenir/asayartem anitettsü atema saisapong ya hadir ka ama amshitsü onok bendanga agütsür lir. Onoki talisa lanurtem saisapong balala jangrabangra asayadaksütsü atema teyari agütsüner. Nüburttem taküm nung tajangzük lidaksütsü atema onoki sentongtem ayongzüka agir," ta Dorians Society-isa metetdaksü.

## Anurag Thakur-i Hockey India telemtetba aitsü

**Mongputeni/October 10, 2021 (Agencies):** Hockey India-i taruba küm Birmingham, England nung asayatsü aliba Commonwealth Games nung shilem magitsü atema telemtetba agiba atema Union Minister for Youth Affairs and Sports Anurag Thakur-i Deobarnü parnok aitsüogo. Pai ashiba agi, iba telemtetba ya federation kijai dang agitsüba masü aser sorkar den ken o ashishitsü asü.

"Federation ajaki iba amala olen jembiba nungi pilaa alitsüla ta bilemer. Parnoki sorkar den mezüing tongtepreteptsü asü. Federation indang team oa asayatsü masü saka linük team asayamung nung oa asayatsü. Nütsünyongsökü crore 130 aliba linük nung linük tenüing nung oa asayatsüpur nisung 18 dak timba lir. Hockey India-i sorkar

asor Sports department den tongtepreteptsü," ta Thakur-i Deobarnü New Delhi nung osang benertem dang ashi.

"India amala linük tulu ka nung linük tenüing nungi asayatsüpur nisung 18 dang timba lir ta ni jangjatsüogo. Linük nung hockey asayar aika lir. Cricket asaya reprangdangra tang IPL asayadar aser iba sülen World Cup asayatsü. Parnok asayateetra kechiba tanga asayaa kasaji inyaksangshi mesüteter? Asian Games tongtibangba ta ni angateter, saka iba indang ni mejembiner; ni shinübaji India asayatsübaji federation dak dang keta mali; ibaji sorkar daka keta lir," ta pai ashi.

England-i November ita Bhubaneswar nung asayatsü aliba Junior World Cup nung shilem magitsü telemtetba agiba

sülen India-ia taruba küm Birmingham Commonwealth Games nung India tetsür aser tebur team masayatsü ta metetdaksü. Team anapronglai bendanglen nungi arurtem anogo 10 quarantine asütsü lateter aliba ajanga asayamung nung shilem magitsü telemtetba agiba kuli agütsü.

Mongolbarnü Indian Olympic Association (IOA) tir Narinder Batra dangi shiti ka nung Hockey India tekolakba Gyanendro Ningombam-i, India nung dak rangloker tenokdangba tesashi agütsüba ajanga CWG nung shilem magitsü telemtetba agi ta ashi. Sorkari iba asayamung nung tebur team-i shilem agitsü akok ta sangdongba sülen ghonda ishika dang lir shilem magitsü telemtetba agiba sangdonga liasü.



Las Vegas, Nevada kübok T-Mobile Arena nung WBC/Lineal heavyweight championship atema asayaba mapang Tyson Fury-i Knock out sütsüba sülen Deontay Wilder atem nung longdaka aliba noksa nung angur. Fury-i iba asaya round 11buba nung koka liasü.

## WC atema Sohaib Maqsood melena Shoab Malik shimogo

**Mongputeni/October 10, 2021 (Agencies):** Pakistan nungner cricket asayar Sohaib Maqsood teberem yiruba sülen taruba T20 World Cup nung masayatsüsa kümogo aser pa melena asayar tejen Shoab Malik shimogo.

Maqsood ya teberem MRI scan ka agiba sülen asayamung nung shilem magidaksütsü telemtetba agi.

WC atema asayar 15 agi kümteba squad nung Maqsood densema liasü, ajisüaka October 6 nü pa Gaddafi Stadium, Lahore nung National T20 Cup nung Southern Punjab tenüing nungi Northern den asayaba mapang pa yirua liasü.

Pa yiruba tesem MRI scan asüba sülen pa aneptsü atema mapang agitsü ta sayuogo.

"ICC Men's T20 World Cup nung shilem magiettsüsa akümba atema Sohaib kanga mepelar, kechiyong pa iba asayamung atema kanga meranga inyaka aruogo aser pa kanga junga asayaa liasü," ta

chief selector Muhammad Wasim-i ashi.

"Onoki pa atema aria bilemetsür, ajisüaka saisapong nung yirubaji sendaka dang lir. Pa temang anepaluba sülen tarutsü nung asayatsü atema renemshia atatettsü imlar.

"Pa melentsü atema team management den sensak asema sülen onoki Shoab Malik anioktsü telemtetba agiogo. Shoab indang experience ya team asoshi kanga tajangzük asütsü," ta paisa ashi.

2007 küm mezüingbuba T20 World Cup asayaba mapang Malik ya team captain liasü aser 2009 küm iba asayamung akokba team nunga pa densema liasü. Maneni pai 2012, 2014 aser 2016 küm iba asayamung nung shilem agiogo.

Ajisüaka pa Pakistan tenüing nungi taoba küm England den tatemsa asaya aser ibayongji asayar shimertemi lanur asayar ang ka shimtsü atema asdanga liasü.

## Brisbane Heat nung Poonam Yadav denogo

**New Delhi, Mongputeni/October 10 (Agencies):** Women's Big Bash League (WBBL) nung asayatsü atema India tetsür cricket team nung spinner Poonam Yadav-i Hokolbarnü tenangzüktepba yangluogo. taruba season atema Brisbane Heat-i club nung Poonam aniokba sülen, lai Women's Big Bash League (WBBL) nung shilem agitsü nangzüktep.

WBBL season atema, tenangzüktep agir India tsür cricket asayar rongnung Poonam 8buba asütsü. Iba League nungla Shafali Verma, Radha Yadav (both Sixers), Smriti Mandhana, Deepti Sharma (both Thunder), Richa Ghosh (Hurricanes), Jemimah Rodrigues aser Harmanpreet Kaur (both Renegades) nung den külemi asayatsü.

New Zealand tsür Amelia Kerr asayamung nung shilem magiettsüsa akümba sülen, Brisbane Heat nung arishi küm 30 tain Poonam aniok.

New Zealand indang England tour atema anisüngzüka renemshitsü osang agütsüba sülen, taoba ita Amelia-i Big Bash toktsü.

"Amelia Kerr-i Club

toktsütsü osang agütsüba mapang, onoki team nungittsü aser asayatsütsü ama temolung lema liasü, saka club nung Poonam bendenloksü maongka ngua, la sempet ajanga team pur lenla aisü nung ajangzüksü teimla lir," ta Heat coach Ashley Noffke-i ashi.

"La (Poonam) ya bowler balaka lir aser team line-up nung la ama sempet tajung alir asayar ka aniokba ya tajangzük asütsü. Jess Jonassen-i Poonam bowling nung asayadangogo aser Captain ka ama, Heat nung lai Poonam den külemi asayatsü asoshi yongyar," ta Ashley-i ashi.

Tang asaya aliba Australia indang multi-format tour nung Poonam Yadav India tenüing nung shilem agidar. India aser Australia na ODI asem tashi asayaba mapang, Poonam-i match ana nung shilem agiogo.

Taoba küm tetsür T20 World Cup nung, India aser Australia asayaba mapang, Poonam-i wicket 4 (4/19) out sütsü aser WBBL nunga lai kanga junga shilem agitsü Brisbane-i imlaa atar.

2013 küm cricket asaya nung ajemokba sülen Poonam Yadav-i Test 1, ODIs 54 aser T20Is 71 asayaogo.



### 21buba NSF Martyrs' Memorial Trophy

October 11 nü IG Stadium nung asayatem:

1. Chandmari HSS Alumni vs Aztec FC @ 11:30 AM
2. Tyrants FC vs Magdaline Coaching FC @ 1: PM
3. Puliebadze Club vs Tribal Homies @ 2:30 PM

## BILEMDANGANG

"Tamakokji shisa kaa tenzüksütsü maongka tajung lir."